

## TE VEA MAOHI

## Aratai no te Anoanotupu no te mau Haapao raa Farani i Oteania

## NENEI HIA I TE MAU AVA'E ATOA

TE HOO: Hoê matahiti: 10 farane — Te Vea hoê: 1 farane.

MATAHITI 1941.  
N° 22.

Vea tuati i te Vea a te Hau no te mau Haapa'o raa Farani i Oteania.

TITEMA

## Mau faaue raa mana a te Hau

## Vea na te Hau no te 1 no titema 1941.

FAAUE RAA n° 515 j, no te 13 no novema 1941.

Irava 1. — Ua maiti hia'enei o Bouby (Jean), ei haava mono i roto i te tiripuna faehau e rave hia no te ohipa a Isaac Walker e to'na mau hoa, ei mono raa ia Martin o tei ore e nehe-nehe ia tia mai i taua haava raa ra.

Irava 2. — Na mua'e e mau ai Bouby i teie nei toroa, e horeo atu ia oia i mua i te ture mai te au i te mau faataaraa.

Irava 3. — E haamana hia e e faatae hia teie nei faaue raa i te mau vahi atoa e au ai ra.

FAAUE RAA n° 518 c, no te 14 no novema 1941.

Irava 1. — Ua faaue hia te taata ra o Tautu a Tautu Mataroa i ta'na ohipa tuha vea, mai te 7 no novema 1941, i Papeete (Moorea).

Irava 2. — Mai te reira'tu mahana, ua maiti hia Mahinepeu (Teroonui), ei mono atu ia Tautu a Tautu i nia'toa i te reira toroa, a mau noa'i oia i to'na toroa mutoi i roto'toa i teie nei mataeinaa.

Irava 3. — Mai te au i te irava 12 no te faaue raa no te 27 no tenuare 1939, e faanuu hia ia te tufaa moni a Mahinepeu mai teie te huru:

|                |   |                                |
|----------------|---|--------------------------------|
| Toroa mutoi    | : | 3.840 farane i te matahiti hoe |
| Toroa tuha vea | : | 360 — — —                      |

Irava 4. — E haamana hia e e faatae hia teie nei faaue raa i te mau vahi atoa e au ai ra.

FAAUE RAA n° 524 s, no te 15 no novema 1941.

Irava 1. — Ua faaore hia te faaue raa numera 430 c, no te 10 no topa 1941.

Irava 2. — Ua faahoi hia mai te tuati vahine numera hoe 1000 Lavigne i te fare ma'i i Papeete. — E hoi mai oia i te faatae matamua o te pahie na Raiatea mai.

Irava 3. — E haamana hia e e faatae hia teie nei faaue raa i te mau vahi atoa e au ai ra.

FAAUE RAA n° 525 i.s.l.v, no te 18 no novema 1941.

Irava 1. — Mai te mahana matamua no tenuare 1942, e ta-

hoe hia mai te mau tufaa fenua o te mataeinaa o Maroe i na mataeinaa o Fiti e Haapu mai teie te huru:

1° Te mau vahi i parau hia e: Vaihaapa, Vaihi e Mihinora ua tahoe hia ia i te mataeinaa ra o Fiti.

2° Te mau vahi hoi i parau hia e: Parurumatai. Niufaaua, Vaioa, Tio e te motu ra o Vaiorea, ua tahoe hia i te mataeinaa ra o Haapu,

3° Te mau vahi i parau hia e: Homoana, Torohe e Teoia-hurai, ua tahoe hia ia i te mataeinaa ra o Tefarerii.

Irava 3. — E haamana hia e e faatae hia teie nei faaue raa i te mau vahi atoa e au ai ra.

FAAUE RAA n° 529 s.g., no te 19 no novema 1941.

Irava 1. — E 5.000 farane te tufaa moni e horoa hia'tu na te Taiete Faehau no Tahiti nei.

Irava 2. — Tei te pene 4, i te irava 3 paratarafa 1 no te mau haamau'a raa a te hau no te mau faehau te tuu raa hia teie tufaa moni.

Irava 3. — E haamana hia e e faatae hia teie nei mau faaue raa i te mau vahi atoa e au ai ra.

FAAUE RAA n° 538 s.g., no te 20 no novema 1941.

Irava 1. — Ua faatia hia te taata ra Yan Thong n° 2938 ia tamau i to'na pae fare i te hoe matini mori uira hoe puahorofenua e te afa te puai.

Irava 2. — Ua haamana hia te Tavara Hau no Raiatea no te rave raa i teie nei faaue raa o tei faatae hia i te mau vahi atoa e au ai ra.

FAAUE RAA n° 539 s.g., no te 29 no novema 1941.

Irava 1. — Ua faatia hia te taata ra o Pierre Mauri Ebb, e noho i Vaitoara ia tamau i to'na pae fare i te hoe matini mori uira ei turama i to'na ra utuafare.

Irava 2. — Ua haamana hia te Tavara Hau no Raiatea no te rave raa i teie nei faaue raa o tei faatae hia i te mau vahi atoa e au ai ra.

FAAUE RAA n° 540 s.g., no te 20 no novema 1941.

Irava 1. — Ua faatia hia te taata ra a Bernardeau (Marcel) e noho i Tevaitoa i te tamau i te hoe matini hoe puahorofenua e te afa te puai no te faatere i te mori uira.

Irava 2. — Ua haamana hia te Tavana Hau no Raiatea no te rave raa i teie nei faaue raa o tei faatae hia i te mau vahi atoa e au ai ra.

FAAUERAA n° 542 j., no te 24 no novema 1941.

Irava 1. — Ua farii hia te ani raa a te vahine ra o Adouda Mohamed Areski e aore ra Adour, e e faaipoipo oia mai te parau popoa ore i te taata ra ia Hitoti a Hitoti. Ua fanau hia teie nei vahine i Noumea i te 6 no tiurai 1900.

Irava 2. — E pia hia teie nei faaue raa i nia i te puta tivira i te taime e rave hia'i te oroa faaipoipo raa o teie nei vahine

Irava 3. — Te Auvaha Ture tei haamana hia no te rave e te faaoti i teie nei faaue raa o tei faatae hia i te mau vahi atoa e au ai ra.

FAAUE RAA n° 560 c., no te 26 no novema 1941.

Irava 1. — Ua faao hia te taata ra o Yves Boubée i roto i te ohipa a te Hau. E 2.100 farane te tufaa moni e aufau hia'tu na'na i te avae hoe.

Irava 2. — Ua tuu hia teie nei taata i roto i te piha toroa no te papai raa tauihaa a te Hau.

Irava 3. — E haamana hia e e faatae hia teie nei faaue raa i te mau vahi atoa e au ai ra.

#### PARAU FAAITE I TE HUIRAATIRA

Te mau hoo taoa tae noa'tu i te feia e patana ta ratou e o tei hinaaro i te faaore i ta ratou ra ohipa raa, ia faahoi ia ratou i ta ratou ra mau patana na mua'e i te mahana matamua no tenuare 1942 e tia'i.

Ia ore noa'tu ratou ia haamano i teie nei faaite raa ra, e tuu hia'tu ia to ratou mau io'a i nia i te tapura patana no te matahiti i mua nei.

Oia'toa te feia e rave nei i te hoe mau ohipa e ta patana hia. ia faatae atoa ia ratou i ta ratou mau ani raa i te patana na mua'e i te mahana matamua no tenuare 1942, ia ore ratou ia titau i te patana a itea'i, e tapiti hia ia te titau raa i taua patana ra.

#### PARAU FAAITE NO TE MONI PEREOO

Te faaara'tu nei te Raatira o te piha Tuanie i te faaue raa no te 22 no me 1929 o tei faataa i te mau utua no te mau pereoo huiira piti, e aore ra huiira maha e rau te huru.

Ia papai hia ihoa taua mau pereoo ra i roto i te piha Tuanie i Papeete e i te mau fare hau hoi, oia i o te Tavana mataeinaa no te mau mataeinaa ia.

Tei te 31 no Tenuare te mahana hopea no te faaite raa i te mau taui raa i tupu e no te faaite raa hoi i te mau pereoo api aita i papai hia:

I roto i te area matahiti ra, e 30 ia mahana na mua'e e riro ai te reira taata ei fatu no te hoe pereoo e tia'i ia'na i te papai.

Te feia hoi i hoo mai i te hoe pereoo papai hia i roto i te area matahiti ra, tei te matahiti ia i muri iho oia e aufau ai i te utua.

Eita roa e nehenehe ia faaore hia te faautua raa i nia i te hoe pereoo maori ra ia papu roa e eita roa taua pereoo ra e nehenehe faahou ia rave hia e ia faa ohipa hia.

E ta taipiti hia te faautua raa i te feia i ore i papai e i haapao i teie nei mau faaite raa.

#### PARAU FAAITE NO TE MONI URI

Te faaara'tu nei te Raatira o te piha Tuanie i te faaue raa

no te 16 no tiunu 1892, e ia papaimau hia te uri i te Fare Faaipoipo raa i Papeete na to te oire e i te mau fare Tavana i te mataeinaa, mai te mahana matamua no atopa e tae noa'tu i te 15 no tenuare i te matahiti i muri iho, o te taime hopea ia, no taua faaite raa ra.

Area ra, mai te peu e aita e tau i raa ra aita ia e faufaa i taua faaite raa ra. — Ei uri api e aore ra ia moe te hoe uri e nehenehe ai te faaite raa no te tau i raa.

E ta taipiti hia te utua i te feia'toa aore i haapao i teie nei mau faaite raa.

#### PARAU API NO TE TAMA'I

Niuniu no te 29 no novema 1941.

Lonedona : Marite. — Ua faaite te piha faatere raa hau marite e aita roa e faa papu raa i tae mai no te haru raa tapone i te fenua Thailande.

Ua faaite atoa te mono hau Thailande e aita'toa ta'na parau i tae mai.

Aita'tu e parau i roto i te mau vea i teie mau mahana, maori ra te huru i nia i te reni aro raa i rutia e te aro raa e tupu mai ra i Lybia.

Te huru i nia i te reni rutia ra, ua itea hia ia e aita'tu ta te purutia e titau raa puai roa'e maori ra ia roaa mai ia'na te hoe vahi maitai no te puhapa raa i to'na ra nuu ia tae i te tau toetoe. No reira oia i faa puai roa'i ta'na tupai raa i te mau vahi atoa ia nehenehe ia'na ia tahoe maitai ta'na opua raa i te pae i ropu.

Ua papu roa e ua faufaa ore roa te opua a te purutia i te haru i te oire Moscou, no reira oia i tamata'i i te hoe atu vahi e i roto i te mau hopea i tae haere mai e au atura e ua manuia rii ratou, tera ra ia hi'o hia te rahi raa o te peu o te nuu purutia, e ere roa ia i te mea faahiahia te re i roaa ia'na.

Area i te pae i raro, ua manuia roa ia te turai raa a te nuu rutia, ua otohe roa te purutia e 400 kilometera i muri e ua tiahi roa hia te nuu o te tenerara purutia i rapae au mai i te oire Rostov e te mau vahi fatata mai ia ore ratou ia faaati hia e te nuu rutia.

Taua otohe raa ra e te faarue raa te purutia i te oire Rostov o te faaatea roa raa ia i te fenua Caucase i te ati rahi ta te purutia i opua maitai e ta purutia hoi i faahinaaro maitai roa.

O Moscou ra, tei roto roa ia i te hepohepo rahi i teie mau mahana, area ra na roto i te tuutuu ore o te rutia, te manao hia nei e e ora mai taua oire ra.

Moscou. — Hoe niuniu no nia mai i te tahua aro raa, o tei faaite mai e ua horo te teneraa Kleist e to'na ra nuu ta'na e tamata ra i te faahoro i te pae i Mariopol. E 5.000 purutia i pohe i te aro raa i Rostov i roto i na mahana e toru i te aro noa raa te rutia ia ratou.

Lonedona : Aita e faaea te topita te nuu manureva mau putuputu raa faehau i Lybia. E piti pahi i tomo i te oire i Benghasi.

Aita roa i manuia te opua raa a te teneraa purutia i Rommel ta'na i tamata e haamotu i te hatua raa a te tenerara retane. Hoe tenerara aravihi i te ohipa tanks o tei roaa mau auri i te paratane.

I te pae i Rostov, te otohe noa ra te nuu purutia e te tamata ra i te haere i Tangarok. Tei Mariopol te puhapa raa te faatere raa i taua nuu raa. Rave rahi mauhaa tama'i e te mau pereoo uira hoi ta te purutia i faarue i to ratou horo raa'tu na Rostov.

Ua fifi roa te opua raa a te purutia na roto i te riro faahou raa'tu te oire Rostov i te rutia. Taui roa'tura ta ratou opua raa aita i taa faahou e nahea.

I te pae i Moscou tei Tula ia te mau vahi rii i manuia te nuu rutia.

Napple (Itaria). — Ua topita faahou hia teie nei oire, hoe fare hamani raa ofai pupuhi e hoe fare hamani raa toropi i tano i te topita.

Lybia. — Ua raea hia te ooa Sirte i te nuu paretane, o te tapu ia i te tere raa tauturu i te nuu purutia.

I roto i na pahi e 8 ta te paratane i faa tomo i nanahi, e piti ra ua tomo maite ia i te faehau e 6 ra ua tomo maitai atoa ia i te mauhaa tama'i e 6 faahou atu pahi rii i tomo atoa, ua roaa hia'tura ia 14 pahi te taatoa raa pahi enemi i tomo i te ohipa a te paretane.

#### Niuniu no te 30 no Novema 1941.

Brazzaville: Etiopia. — E parau faahiahia to roto i te vea paretane i teie poipoi. Te parau no te roaa raa mai te oire paari hopea o te itaria i Etiopia, oia o Gondar. O te hopea te reira o te haru raa ia Etiopia. Tei roto taua fenua taatoa ra i teie nei i te rima o paretane. E nehenehe ia parau e ua hi'a papu Itaria i Etiopia e i Aferita ropu atoa hoi.

E mau parau maitatai atoa ta te vea i faahiti no te mau nuu Farani Vi ore no ta ratou ohipa i rave atoa i Gondar.

Asia. — Te manao nei Marite e Tapone atoa hoi e aita roa i oti ta raua opua raa. Te tiai nei na hau nei i te hoe peapea fatata roa.

Lybia. — Rave rahi pereoo paari itaria e purutia i mou, ua au ia i te opua raa a te Paretane.

Te ite ra hoi purutia i te reira ati, te tamata nei i te faaherehere i ta'na mauhaa, no te mea e ohipa papu ore roa e te fifi rahi te mono i te mau tanks (oia te mau pereoo paari), ua i hoi te miti i te manua e te manureva paretane o tei haa-peapea noa i te tere raa o te mau pahi uta tauihaa.

E e pau rahi to te mauhaa tama'i i roto i te aro raa i te medebara, e mea rahi ae te ino e faatupu hia ra e te one puehu i ta te taata rave raa i te mau tanks. I tupu ai te mau faau raa faehau noa i teie mau mahana, ua vaiho rii hia te faau raa tanks.

Te ohipa a te manureva paretane — I te tahi mau taime, ua hau atu i te 90 manureva hau amui i roto i te aore. I te hoe roa mahana e 200 mau raa te nuu manureva hau amui. I nanahi e 5 manureva enemi i mou e rave rahi tei ino i raro noa i te fenua i te pae i Benghasi. E piti manureva paretane i moe ua ora mai na pailati. Ua faaite te faatere hau paretane Brendon e te 70 raa te tufaa o te manureva paretane teie e ohipa nei i Lybia.

Rutia. — Mai te peu e ua manuia te purutia i nia i te tahi mau reni, te fifi atoa ra oia i nia i te tahi atu vahi. E na roto i te toetoe rahi e tupu nei e mea ohie roa te ma'i te roaa mai e te hoe hoi mau ati i tupu atoa mai.

Te fifi atoa nei hoi te mau pereoo uira no teie toetoe, e paari te hoi no te mea aita i ravai te hinu e au no te tau toetoe i te rutia. Te tamau noa ra te nuu rutia i te haere i mua i Rostov. E 40 pupuhi fenua, 25 mitaraie rarahi, 33 no te miti, 25 pupuhi noa, 150 pereoo uira rarahi e te faa pupuhi e rave rahi o tei roaa mai ia i te hoe nuu raa. Rave rahi vahi i roaa haere mai i te rutia e mea ta aione te rave raa hia te tahi mau vahi e te rutia.

Lonodona. — Te atutu ra te parau e ua huri te purutia i te faehau i Salonique e faehau autiritia.

Moscou. — Te faaite mai ra te niuniu rutia e te tamau noa ra te nuu rutia i te haere i mua i te pae i Kalinine. E 8 vahi i tahi hia te purutia. Ua otohe roa te mau faau raa a te nuu rutia i te pae i Malayoroslavetz.

#### Niuniu no te mahana matamua no Titema 1941.

Brazzaville: Asia. — Te rahi roa'tura te faatitia a te mau faatere hau Tapone i roto i ta ratou mau orero raa parau.

Rutia. — Te faaite maira te niuniu rutia e ua turai roa hia te mau nuu purutia no Rostov haere roa'tu i Tangarog. E pau rahi to te nuu purutia e ua faaite mai te mau vea paretane i Suède e ua riro atoa'tu i te nuu rutia te oire Tangarog, e 80 kilometa i te pae i raro i Rostov.

Ta te niuniu rutia faaite raa ra, ua ateatea roa ia te purumu i Tangarog e 50 kilometa te rahi raa fenua i roaa mai ia ratou e aita roa te nuu purutia i faaea i Tangarog, ua horo ua horo roa ra i Marioupol. Aita ra te rutia i parau e ua roaa ia ratou Tangarog.

Rave rahi hanere faehau amarara rutia i tuu hia i muri i te nuu purutia e horo ra e na te reira ra mau nuu e tupai ra i te mau nuu tauturu o te purutia.

E pau rahi roa to te nuu purutia. Ua parau te purutia e na te hoe mau tanks rarahi roa o te rutia i aro mai ia ratou i te pae i Rostov.

Lybia. — Ua tamata faahou te purutia i te haru mai ia Sidi-Rezegh, aita roa ra i manuia e e pau rahi hoi to ratou.

Tama'i na te moana. — Ua ora te manua purutia ra o Von Tirpitz i te hatua a te paretane i te pae i Magellan, auua te rupehu i moe atu ai oia. Te haere tia ra oia i Tapone.

Lonedona: Cairo. — E ohipa faahiahia te roaa raa mai te tenerara purutia ra o Ravinstein i te paretane i Lybia. E taata aravihi hoi oia no te ohipa tanks. Nana hoi i faanaho i te nuu numera 15 no te tupai ia Aiphiti, aita'tura ra hoi i manuia e i teie nei o te hoe noa tuhaa o teie nei o te hoe noa tuhaa o teie nei na nuu te aro ra i te nuu o te tenerara Cunningham (paretane).

E aro raa rahi papu ore teie e tupu noa mai i te pae i Aiphiti. — Te tamata noa nei te tenerara Rommel i te tupai i te nuu paretane i te hoe vahi tana e imi ra e e mea paruparu, aita roa ra hoi i manuia, hoe atura e e mea paari anae te mau vahi atoa o te nuu paretane.

Ua tamata oia i te faau e te toea o to'na nuu tanks i nia i te reni tuati raa o na nuu paretane, aita ra i manuia.

#### Niuniu no te 2 no titema 1941.

Lonedona: Marite. — E taime maoro to Roosevelt a parau raa e o Hull, faatere Hau Marite, tei reira'toa te Atimarara Stark, faatere i te nuu moana marite i muri ae i te reira farerei atua ai ratou i te mau mono hau Tapone. I te ahiahi roa te faaite raa hia e tei roto atoa Stark i taua apooraa ra.

Vichy. — Ua hoi mai Petain e Darlan i Vichy i teie po, i muri ae i to raua farerei raa ia Goering. Tei roto ihoa i te pereoo auahi i afai mai ia Goering to ratou farerei raa. Mai te poipoi mai te apooraa e ua tamaa ratou i nia noa i taua pereoo ra e ua raea hia te hora 5 e te afa i te ahiahi i oti ai te aparau raa, tei reira'toa o de Brinon mono hau farani i Paris.

Cairo. — Te imi ra te toea o te nuu tanks itaria i te ravea no te haere tia i te pae i nia no te tahoe atu i te toea o te nuu tanks purutia e faatere hia ra e te tenerara purutia ra o Rommel. Atia'toa ra hoi i ateatea maitai te hiroa o te tenerara purutia. Aita oia i papu faahou e nahea ra te tuu raa i to'na mau nuu, i te tahi taime te tuu nei oia i te nuu i te pae i te toaa o te ra, e i te tahi taime te tamata nei oia i te faau atn i te nuu paretane i roto ia Tobrouk.

Rave rahi faehau purutia e tae noa ra i Caire, e ua parau to taua oire ra e e mea maoro roa i teie nei aita i itea hia te reira huru rahi raa mau auri e roaa mai ra.

Noa'tu ai ia te itoitaito ore o te nuu purutia e te puai raa hoi o ta ratou tupai raa i nia ia Tobrouk, te vai noa ra te maitai i te pae o te nuu paretane e te tiaturi mau hia nei e e manuia roa te nuu paretane.

Brazzaville : Rutia. — Te faaite ra Moscou e tei roto roa te nuu purutia i tiavaru hia mai na Rostov i te hoe ati fatata roa. Te turai nei te nuu rutia i te reira enem i te pae miti. E riro paha taua nuu rai te mou roa'tu.

Te faaite atoa mai ra te niuniu rutia no teie poipoi e ua ati roa'toa te toea o te nuu o te tenerara Von Kleist, ua motu roa te vahi ta ratou e horo ra. Rave rahi nuu rutia e faaati ra ia ratou. E mauhaa rahi roa ta te purutia i faarue mai i to ratou horo raa : 118 tanks, 230 pupuhi fenua, 306 pupuhi taviri, 178 taora paura, 4 000 pupuhi, 871 pereoo uira.

Te parau ra te purutia e ere i te re ta rutia i roaa i teie mau vahi, na te purutia ihoa i opua e faarue i te reira ra mau oire no te ino te huiraatira rutia.

Te parau ra te purutia e aita roa te rutia i haapao i te mau ture i rotou i te mau fenua'toa.

Ua faaite oioi roa te faatere nuu purutia e eita roa ratou e hinaaro i te vaiiho noa i to ratou mau faehau ia hamani ino noa hia na e te huiraatira rutia o tei tamau noa i te pupuhi i te faehau i te mau taime e tomo atu ai ratou i roto i te mau oire.

Te faaite ra te purutia e eiaha roa te rutia e te paretane e manao e ua mata'u te purutia i te faehau rutia.

Tama'i na te moana : Ua faatae mai te faatere hau no te moana o paretane e ua tamata hia i te topita i te pahi vea no Paretane e Airani e te manua enem i te manureva e aita roa i ati.

E parau no Singapour mai o tei faaite e ua tomo te manua Auteraria « Sydney » i tua i Auteraria. I te avae fepuare i mairi aenei te tata'i faahou raa hia teie nei manua.

Ua faatae atoa mai ra te hau Auteraria i te parau e ua tomo atoa te pahi i faatomo ia « Sydney ».

#### Niuniu no te 3 no titema 1941.

Brazzaville : Farani. — I roto i te vea "limes", ua faaite hia e te manao hia ra e e mea rahi paha te mau auri farani e tuu mai na Purutia. O te parau ia i faaoti hia i roto i te apooraa i tupu i teie tau mahana i rotou i te mau faatere hau purutia e farani. E tuu hia teie nei mau taata no te rave i te ohipa tauturu ia purutia.

Te parau ra te papai vea i Stockholm e e riro te purutia i te faarue roa ia farani, tapea noa mai ai i te hoe mau tufaa, i te pae i te miti Manche e te miti Atalanita e o Alsace ma hoi. E faatiama taatoa hia te mau farani mau auri e e faaiti hia te utua ia te purutia e titau noa ra ia farani i te mau mahana'toa a noho ai ratou i reira.

Area te hoo ra, o te nuu manua ia o Farani taatoa te horo'atu na te purutia oia'toa te faatia noa raa hia te mau purutia ia hahae e ia rave i ta ratou i hinaaro i roto i te mau aihu'araau farani taatoa.

Rutia. — Te huru papu roa'tura e ua nane roa te otohe raa o te nuu o te tenerara purutia ra o Von Kleist na Rostov mai.

I te pae i Tula, ua tamata te nuu purutia i te faaati i te nuu rutia, aita ra hoi i nahonaho ua na mua mai ta te rutia tupai raa, e na roto i te puai rahi o te nuu o te tenerara rutia Konfev, e au atura ia e te faaineine ra te nuu purutia i tae i Stalinogorsk i te horo atoa no te riarua o te tapu hia te e'a horo raa e te nuu rutia o tei tae roa i mua.

Na roto i te pau rahi o te nuu faehau e te mauhaa tama'i atoa hoi, inaha ua otohe hanoa'tura te nuu purutia i te hoe mau vahi manao ore hia.

Ua faatae mai te niuniu rutia e i te pae i Rostov, e 8 vahi rii i roaa faahou mai ia ratou.

Ta te nuu o te tenerara rutia Kharibinov ra, ua tiahia noa ia ratou i te mau purutia i te mau nuu purutia i te mau vahi i papai hia te tapao "V" et "N".

Te faaite maira te niuniu rutia e te rahi raa o te nuu o te tenerara Kleist te horo haapao ore noa ra ia.

I nia i te reni o Leningrad, e 6 vahi i roaa mai i te nuu rutia e ua tiavaru roa hia te purutia i taua mau vahi ra.

Ua faaite Lossovsky e te titau puai nei te purutia ia Rumania i faao papu mailai roa i roto i te tama'i.

Lybia. — Ua riro faahou Sidi-rezagh i te purutia. — Te faaara mai ra Churchill e mai te au i ta raua parau o te tenerara de Gaulle, e au teie nei aro raa e tupu ra i Lybia i te hoe aro raa i roto i te moana, eita e nehenehe ia parau papu e tei hea ra te puai raa e te itoitoe raa o te nuu, e medebara teie, o ta te nuu hau amui e titau nei, e ere ia i te fenua, o te haamou raa ra i te rahi raa mauhaa tama'i e te faehau enem i. I teie taime ra ua pau te afa raa o te nuu tanks te tenerara purutia ra o Rommel e eita hoi e tae faahou te tauturu, no reira tei puai hopea ta'na e rave nei, mai te hi'o ore roa i te pau rahi. E mea maitai hoi na te purutia teie ateatea raa te nuu paretane, e mea hau roa'tu ra ia na te nuu manureva paretane te reira ohipa, e vai tahaa noa maira ia te nuu purutia.

Tama'i na te moana. — E 3 pahi itaria i tomo faahou i te manua paretane. Hoe manua, hoe pahi uta mori e hoe uta tauihaa, te haere ra i Lybia. Aita roa to te paretane. Ua tomo atoa te hoe pahi'uta tauihaa 3.000 tane i te hoe pahi hopu heleni « Glankos » i tua i te motu kerete. Hoe manua iti paretane i tomo i te toropi, te apee ra oia i te hoe mau pahi uta tauihaa, i nia i na taata 161, 141 i pohe.

#### Niuniu no te 4 no titema 1941.

Brazzaville : Rutia. — Aita roa e haapao raa faahou te nuu o te tenerara purutia Von Kleist, te tamata nei ratou i te titau i te oire Marioupol, 100 kilometa i raro atu ia Tanganrog. Te mau nuu i taupupu te horo raa ra, ua nina roa hia ia e te nuu rutia. I te pae ati no te mauhaa ra, tei te rutia ia te re. Ua faatae mai te piha faaite parau api no rutia i te tapura no te rahi raa mauhaa tate purutia i mou : 118 tanks, 220 pereoo uira rarahi, 306 pupuhi taviri, 178 pupuhi toropi, 4.000 pupuhi, 871 pupuhi fenua, e te mau ahu mahanahana e rave rahi.

Te faaite maira Moscou e tei te pae nia i Tula te puai raa te aro raa. Hoe nuu faehau purutia turu hia e na tanks e 30 o tei o i te hoe vahi i Tula. I reira to te nuu rutia faau raa e mau atu te enem i.

I te hoe vahi fatata'toa mai i reira a tahi ahuru ma hoe ia mahana to te nuu purutia tamata noa raa i te haere i te tahi atu mai pae i te anavai e aita roa i manua, e pau rahi roa to te enem i reira.

Te parau ra te vea "Pravda" e i muri ae i na maha 17, ua huru paruparu te turai raa a te purutia i te pae i Moscou.

I te pae i Kliin e Stalinogorsk, tei nia ia i te parur purutia, e te tamata noa ra i te horo tia i te pae i ra rahi roa te toetoe i nia i te reni i ropu e no reira aita nahonaho maitai te mau pereoo ia faatere hia e mauhaa rahi roa. Ua mau atoa hoi te tere o te enem i te pae i Kursk.

Ua faahiti te niuniu purutia e ua riro atu i te finilane te otue Hangoe. Aita roa ra e parau i faa papu mai i te reira.

Lybia. — Tei nia te puai i te nuu manureva paretane i Lybia. Rave rahi vahi e tae hia ra e taua nuu ra : Bardia, Tripoli, aita ia e faaea ra te farerei i te ati. E nehenehe roa ia

faaau hia te rahi pau o te manureva enemy e to te paretane i nia i te hoe e e piti e te afa to te enemy e mou ra.

Yugoslavia. — Ua tae mai te faaite raa a te Yougo e e toru nuu to te purutia e itaria e tama'i ra i to ratou pae e te vai atoa ra te nuu tanks e te manureva e ua tamata mai ratou i te hoe faaau raa rahi i nia i te reni o te Yougo e faatere hia ra e te tenerara Brazza Milailovie i te pae i Ozice, aita'toa ratou i paruparu, no te nuu tanks ra ratou i otohe rii ai.

Lonedona: Rutia. — Ua mau te tere o te enemy i te pae i Kursk, area ra aita'toa i araa roa te hiroa i te pae i Orel, ua tamata faahou mai hoi te enemy i te turai.

I te pae i Lybia, e au atura e te faaineine ra te nuu paretane i te hoe rave raa puai no te haru mai i te mau vahi i riro atu i te purutia.

Ta te vea "Times" parau raa ra, te nao ra ia e : i te monire i mairi aenei e mea huru ino ia no tatou, area ra te hinaro nei tatou i teie nei i te faaitoitou puai.

E parau mau atura te mau faaite raa i te re i roaa mai i te rutia i te pae i raro, e mau parau rahi i roto i te mau vea'toa i teie mahana.

Tei te pae ra i Moscou te fifi raa te rutia, ua mau rii ra hoi te enemy i tei poipoi i te patoi a te rutia. Ua faaite te niuniu e ua roaa mau mai Tanganrog i te rutia.

#### Niuniu no te 5 no titema 1941.

Brazzaville. — Ua motu iho nei te hau i rotopu ia Marite e Tapone, mai te peu e hoe a huru te parau ta te hau Tapone i faatae i roto i te rima o te faatere hau Marite, Cordell Hull e te mau parau i nenei hia i roto i te mau vea Tapone, ua tupu mau ia te peapea i rotopu i na hau nei.

Rutia. — Aita roa e vahi maitai i roaa i te purutia i mua i Moscou. O te maha o te tufaa o te nuu purutia teie e faaea tamau nei i mua i te oire Moscou. Te tupai tamau noa ra te nuu purutia i nia i te mau reni paari o te rutia e aita roa i i faufaa hia.

I te pae i Mojaisk, e 3 mataeinaa i roaa faahou mai i te rutia, e ua horo te enemy na roto i te mau uru raau, o ta te nuu faehau rutia ia e tiavaru tamau noa ra.

Aita'era i nehenehe i te enemy ia haere i te tahi mai pae i te anavai, te tamau noa maira hoi te nuu rutia e noho ra i Narominsk i te tapea ia ratou.

I te pae i Orel, e 4 mataeinaa i roaa faahou mai i te rutia i mua i hia'tu ia i na mataeinaa e 30 o tei roaa mai i na mahana i mairi aenei.

I Ukarania ra te tamau noa ra te nuu purutia i te horo, te manao hia ra e ua hau atu i te 24.000 taata to te purutia i mou i reira. Aita e faaea te tapapa a te nuu o te tenerara rutia Timochenko

Aita'toa e faaea ra te ohipa a te mau huiraatira rutia, rave rahi fare e ua ra i te auahi, tae noa'tu i te hoe mau vairaa mori, te mau manureva i roto i te tau raa, te mau ohipa'toa e vai mai i mua i te aro o te huiraatira e tanina hia ra i te auahi, te mau reni pereoo auahi, ua totoa'toa hia.

Ua faaite mai te niuniu rutia e mai te haamata raa mai te purutia i te otohe, ua raea hia te 90 mataeinaa i roaa faahou rutia.

Ua faaite mai te niuniu rutia e mai te haamata raa mai te purutia i te otohe, ua raea hia te 90 mataeinaa i roaa faahou rutia. I te vea "New-York Times" i te hoe parau mai i te otohe ati maitai ra i teie nei te nuu rahi o purutia, i teie ra te tapao no to ratou paruparu. E hopea ihoa i te itoitou. Te hiti maira te tiaturi i teie nei; te fatata maira te taima no te hau e te tiama, te moe ra te hiroa riaria e te peapea te mau ohipa iino a te enemy. Eita ra hoi te purutia e nehenehe ia faaite hua roa e ua paruparu oia.

Lybia. — Mai El gobi. 50 kilometera te atea i Tobrouk haere roa e Enadeg te roaa ra ia o te reni purutia e itaria

Farani. — Te manao hia ra e e riro te purutia i te haru i

te mau pahi farani atoa e vai ra i roto i te miti Mediteraneani no te uta i te tauturu i to'na tenerara ia Rommel i Lybia.

Y.Z.Y. — Te faaite ra te papai vea Yorkshire e hoe a tae raa te tenerara Von Kleist e te hoe mau raatira faehau purutia no roto i te faatere raa nuu a Keitel, te manao hia ra e e iriti hia paha te toroa o teie nei tenerara e o te haru teie nei mau raatira api i te faatere raa i te nuu. Te manao papu roa hia ra e ua faarue hia teie nei tenerara, ua tae atoa mai o Von Brautchich i teie nei mau vahi e nana e faaue nei i te nuu.

Ua tae haere mai te hoe mau nuu rii api purutia no te tapea i teie nei otohe raa rahi.

Aita roa i taa faahou i te purutia e nahea ra te rave raa i teie mau mahana, ta ratou opua raa ra o te aratai ia i te nuu rutia i nia i te reni paari e vai ra i Marioupol.

#### Niuniu no te 6 no titema 1941.

Brazzaville: Rutia. — Te haapaari ra te rutia i te mau vahi i roaa faahou mai ia ratou. — Te puai roa'tura te toetoe i te pae i Moscou. — I te mau mahana'toa tauasini e tauasini te faehau purutia e roaa hia ra e te ma'i e rave rahi hoi mau pereoo e ore ra e tere faahou no te toetoe. — Te tamau noa'toa ra te mau rutia i te totoa i te faehau purutia. — Eahu uouo to teie nei pupu taata e no te matau hoi ratou i te ohipa horo na te hiona, i oioi roa'i to ratou mau tere i tera vahi e tera vahi no te haapeapea raa i te mau faehau purutia. — Na te mau nuu purutia e farerei hia ra e ratou te maa, te mauhaa e te tahi atu ta ratou e haru haere i te tai me e roaa'i ia ratou. — I te pae i Ukarania, te tamau noa'toa ra te tenerara Tomochenko i te haere i mua. — 10.224 faehau purutia i pepe e i pohe i te hepetoma i mairi aenei i te aro raa i te pae i Volokolamsk.

Lybia. — Aita e faaea te topita hia te mau vahi tata'i raa pereoo paari a te enemy i te pae i Lybia na te mau nuu manureva paretane.

Turetia. — Ua tano maitai te tae raa te tauturu a Marite i Turetia i teie taima te rahi roa'tura hoi te faaineine raa a purutia i te pae raro i Bulutar.a.

Lonedona: Ottawa. — Ua faaroo hia e ua parau te faatere hau Canada e e oioi noa Canada i te faatupu tama'i atoa'tu ia Finilape, Honeteria e Rumania. mai te peu e e na reira o Paretane.

Moscou. — Rave rahi faehau pepe e i pohe to te purutia i na mahana i mairi aenei i te mau aro raa i tupu i te pae i Volokolamsk.

#### Niuniu no te 9 no titema 1941.

Brazzaville. — Te faaite raa a Domei, te nao ra ia e, i te taima a faau ai te nuu Tapone i Singapour, te maurere haere ra ia te nuu manureva i nia'e i te mau tuhaa fenua paretane i Malaisia. — E te faaite atoa ra taua vea ra e e mea ohie roa te haru raa mai te tapone ia Tien Tsin e Shanghai. Area te nuu manureva tapone o tei haere topita ia Manila, ua farerei ia ratou i te mau pa maurere a te marite. — Te faaite maira Tokio e ua maurere hia ratou e te manureva enemy. Ua tae te nuu tapone i roto ia Bangkok (oire pu no Siam) i te hora 9 i te po. Ua haere faahou te manureva tapone i nia'e ia Davau (Philipino). — Te faaite maira te niuniu Singapour e e aro puai te tupu ra i rotopu i te nuu paretane e te tapone.

Rave rahi manureva tapone e tonono nei i te mau vahi atoa no te tamata i te haru mai i te hoe mau tuhaa fenua e te tamata hoi i te topita haere i te manureva paretane e marite a riro atu ai ia'na te numera hoe no roto i te reva. — Na te nuu manureva tapone i tauturu i te taima a huri ai ratou i te nuu i te pae i raro ia Siam. I te pae i nia i te motu Borneo, aita i nahonaho te huri raa tapone i uta i te itoitou o te nuu paretane.

Ua faatae te Poa i te faaite e tei roto atoa oia i te tama'i e Tapone.

Ua faaite te vea New York Times e 1.500 marite i pohe i teie i nia i te aro raa.

Ananahi mahana toru i te hora 12 e orero ai Rousevelt na te reva, e faatae hia ta'na parau na roto i te mau niuniu atoa o Marite, ei reira oia e faaite ai i te mau ohipa i tupu i na mahana i mairi aenei. 110 taata i pohe i Vaihi i te ohipa a te Tapone. Aita i faaea te topita hia te mau vahi paari faehau a te Marite na te Tapone. Ua hau atu i te 100 taata i ati i Manila. Ua haere te nuu tapone i uta i te motu Labang, aita ra te reira parau i faa papu hia mai. Ua tomo te pahi uta manureva tei tie i te mau manureva i topita ia Vaihi. Te tamau noa ra te mau ohipa patoi raa i te tapone i Vaihi, ua mou te hoe mau manureva tapone e ua tomo hoi te hoe mau pahi hopu i te pae i Vaihi.

Te tie noa ra Marite i te mau tauturu e au i Vaihi.

Hoe niuniu no Singapour o tei faaite e te tamau noa ra te nuu manureva paretane i te topita haere i te mau pahi tapone uta tauihaa e te nuu. E 2 pahi i ura i te auahi. Aro raa puai i Kota Barhu e Abak.

E pupu manureva tei itea hia i te tamata raa i te haere i San Francisco aita ra i taa te hau. — Ua faaea te mau niuniu radio marite, no te haa fifi raa i te tere o taua mau manureva ra.

Libya. — Te maitai faahou ra te nuu paretane. — Tei Bir el Gobi. — 18 tanks purutia i mou i Sidi Rezegh. — I te pae i raro i Tobrouk e mea puai roa te tupai raa a te paretane i te nuu purutia. — Aita e faaea te topita a te nuu manureva paretane i te mau purumu o te enemi. I Cyrenaique e Tripoli ua mou roa te rahi raa vahi paari o te enemi e te mau purutia e roaa haere mai i te mau auri ua ivi roa e te pohe poia aita i tamaa i te tahi tau mahana maoro. Aita'toa i faaea te mau nuu pereoo paretane i te tupai i te enemi i te mau vahi atoa e ite hia'ru ratou. Hoe vai raa pupuhi fenua purutia e na taata e 90 o te mou roa.

Rutia. — Te maitai noa'tura te hiroa o te rutia i te mau mahana'toa i teie nei. Te faatia ra te afai parau purutia e te turai puai nei te rutia i teie nei e i te hoe vahi i Rostov, ua puta roa te reni purutia.

Eiaha tatou e maere e o te tau i te rave raa a te rutia. I te mau mahana tei ia ratou te vahi maitai e e riro paha te rutia te oua i rapae e te haamata i te turai i te enemi maita te purutia i rave aenei.

E mau maitai e rave rahi tei roaa i te rutia e ua ite roa te mau faatere e ua au te taime no te tupai i te enemi mai te faaea ore.

#### Niuniu no te 10 no Titema 1941.

Brazzaville: Paretane. — Ua faaite te Atimarara faatere nuu Paretane i te ati o te nuu moana paretane na roto i te tomo raa na manua rarahi "*Prince de Galles*" e o "*Repulse*" i te aro raa i te nuu tapone e tamata ra i te haere i uta i Malaisie. Aita roa e mau parau faapapu i taua ati ra i tae mai maori ra te niuniu tapone o tei faahiti e na te manureva tapone i topita i taua na manua ra.

Lonedona. — Te faaara maira e e riro Churchill i te faaite na roto i te orero raa na te reva i te pau o te nuu moana paretane i teie tau mahana. O te numera 2 o "*Prince de Galles*" no na manua e pae 35 000 tane o Paretane. E manua 32.000 tane oia o tei oti i te hamani hia i te matahiti 1916, ua tae atoa oia i roto i te mau tapapa raa i te pahi enemi i te miti Atalanita nia.

Tama'i i Patifita. — Ua faapapu hia mai e te aro ra tapone i te Manila, i nia i te mutu Luzon, na te fenua. na te reva e na te tai atoa hoi.

Motu Guam. — Ua faatae mai te faatere hau e ua tae mau te nuu tapone i uta i taua motu ra.

Singapour. — I roto na hora e 24 i mairi aenei, ua tamau noa te enemi i te aro na te reva e na te fenua hoi i taua motu paari paretane ra, aita roa ra i manuia.

Ua titau te tapone i te pae i nia i Malaisie, i te vahi i mua i te motu Penang e pae manureva tapone i ati.

Na roto i te tere hiopoa o te nuu manureva paretane, inaha ua itea i tua i Kotabura, Patani e Singora te rahi raa pahi e tutau noa ra i reira.

I te pae poipoi roa, ua tamata te tapone i te huri i uta i te nuu i nia ia Kuanttant, i Malaisie.

Ua tae mai i nanahi te tauturu paretane mai Initia Holane mai, e mau manureva e rave rau te huru. E tamata raa noa teie nei ohipa i rave hia e te tapone no te faahuehue noa i te mau hau amui e te tamata raa hoi i te faataupupu i te tere raa o te mau pahi. Te tupai raa i rave hia i nia ia vaihi ra hoe roa ia ohipa faa hitimahuta i manuia eita paha e nehenehe ia tapiti faahou hia te reira tano. Aita'tu e opua raa la tapone i rave ai oia i te reira ohipa maori ra te tamata i te haamou i te taime hoe i te rahi raa taata e te mau manua marite hoi e vai ra i taua motu ra.

I teie nei e piti noa'tura ia ta tapone opua raa: O Malaisie i te tahi pae e Hong-Kong e Manila i te tahi atu pae.

Te faahiti hia ra i Marite e i taupupu ai ta Rutia faatia raa tama'i e Tapone ra no te ore raa ia Marite e faatia tama'i nei ia Purutia, o te huru ia o te tuu raa reo e manao hia to Litvinov. mono hau rutia i Marite.

Na roto i te hoe mau vea paniora te faaroo hia nei e e haaputupu Hitler i te mau mero o te apooraa rahi purutia, e te manao hia e i roto i taua apooraa ra ei reira Hitler e faaite ai e eaha ra te tia raa o Purutia i mua ia Marite.

Reni Rutia. — Ua haamata faahou te rutia i te turai puai i te nuu purutia i te pae i Tikvhin. E 3 nuu purutia i horo haapao raa ore noa i reira, 7.000 purutia i pohe. E rave rahi mauhaa tama'i i roaa mai i te rutia. Te tamau noa'toa ra te turai raa a te rutia i te pae miti Azov. Faau raa puai roa i te pae i Tangarog. I te pae i Moscou, e mea manuia roa te tamata raa a te rutia i te turai i te nuu purutia. Tei nia noa te nuu purutia i teie nei i te paruru ia'na, aita'tura e turai faahou. Na roto i te hi'o raa a te mau taata aravihi tama'i Suède, e mea aiti roa te purutia i te pae i Tikvhin. Te parau ra hoi vetahi pae taata e e riro paha te nuu purutia i rutia i te faarue hoi i roto i te ati pohe. Ua faahiti atoa hoi te faatere nuu purutia e e mea ati mau oia e aita roa e ravea no te tapea faahou rutia. Te faahiti hia ra te hoe aro raa i te pae i Karkhov, faaite ia e ua tau i roa te reni o te purutia.

Lybia. — Ua topita te manureva paretane e 2 pupu tie haa enemi i te pae i El Adem e Acroma, rave rahi tau i te ati e i ura i te auahi. O Derna ta te nuu manureva aita'rua i roto i topita, 8 manureva i ati i nia i te fenua noa. Ua tae hia te mau fare vai raa tauihaa i Bardia.

Y. Z. Y. — Rutia. — Te otohe ra te nuu purutia i ni taatoa. Ua papu paha o te purutia e aita'tu e mea fia ratou, maori ra te tia i te tau maitai, ua puai roa hoi te turai a te rutia e te toetoe atoa hoi, te tamata ra te purutia i te hoi faahou i nia i te reni ta ratou i roaa i te 15 no atopa mairi aenei.